

на том месте собрав и отпев сохрани. По сем поиде ко граду Пронску, и собра раздробленные уды брата своего князя Олга и принесе его во град Резань, а честную его главу сам князь Игорь до града несе, и целова ю любезно, и положи со князем Юрьем Игоревичем во едином гробе. А князя Давида да Глеба положи у них близ гроба во единой раце. По сем поиде князь Игорь Игоревич на реку Воронеж, где убиен князь Федор Юрьевич Резанский и взят тело его и принесе к великому чудотворцу Николе Корсунскому въ его область и тело благоверной княгине Еупраксен и сына их князя Ивана Федоровича. И положи их троих во единомъ месте, и постави над ними кресты каменные. И от сея вины уставися зватися Николае Заразский, яко княгиня Еупраксея с сыном своим сама себе зарази. Благоверный же великий князь Игорь Игоревичъ дасть лготы Резанской земли на сто лет, и обнови землю Резанскую, и основа град, и церкви божия постави, и монастыри устрои. И много людей паки збирахуся на веселие, славяще бога.

Редакция Риторическая

Текст по списку Библ. им. Ленина, собр. Никифорова 501

Сказание известно от древняго списания о пренесении многочюдеснаго образа, иже во святых отца нашего Николая архиепископа мирликийских чудотворца из греческаго града Корсуни в великую Россию на Рязань в Зараск.

Велий господь наш и велия крепость его и разуму его несть числа. Бысть же в лето от сотворения света 6732-е, от крещения же славнодержавнаго Владимира по летех 236, во дни великаго государства благовернаго и великаго князя Георгия Всеволодовича Владимирскаго и всеа России, и при великом князе Ярославе Всеволодовиче Новгородском, и при сыне его великом князе Александре Невском в Переяславле граде, и всею страню Резанския епархии владычествуя великий князь Георгий Игоревичъ. Бяше бо в державствующих любовь нелицемерная и живяху по заповедем Христовым непорочно, яко же подобает святым. В лето же сие в славном граде Корсуне, везде и во всей вселенней славный и великий во ерарсех и дивный в чудесех мирликийских архиепископ Николай является нощию в сонном видении некоему иерею житием добродетелну служителю церкви святаго апостола Иякова Заведова именем Ефъстафию, сице глагола: „Ефъстафие, востав возми образ мой, сущий в церкви святаго апостола Иакова, брата святаго Иоанна Богослова, и иди отселе в землю Резанскую. Тамо бо хощу быти, и чудеса творити, и место прославити. Ты же поими с собою и супругу свою Феодосию, и сына своего Евъстафия“. Иерей же от видения воспрянув, с великим ужасом сему ж бывшу. И паки во вторую ночь святой Николай явися, то же рек и в болий страх Евъстафия введе. И начат помышляти и глаголати: „О великий святителю Николае, како повелеваеши, ми рабу твоему, со святым своим образом итти?